

COMPETENCIA**Futuro Fiscal a competi
cu resultado excelente**

E estudiante Max Ng a representa Aruba den e competencia "OM Nationale Requireerwedtrijd 2026" na Amsterdam, Hulanda. E ta un competencia prestigioso unda ta reta talentonan huridico riba tereno di derecho penal y dunamento di pleidooi, pues requisitorio.

Danki na un preparacion intensivo y un guia solido, Max a logra di presenta su mes na forma excelente, incluyendo dilanti un oponente cu hopi aña di experiencia. Mas detaye na Pagina 5.

**Transparencia no
ta un favor cu un
Ministro ta haci
na Parlamento**

*Parlamentario Shailiny Tromp
papiando cla y raspa*

- *E ta un obligacion tanto legal y moral*
- *Ningun claridad ainda riba e famoso biahe den jet priva di Ministro*

Combersacion profundo encuanto asunto di vivienda na Aruba

ORANJESTAD (AAN): Comerciantenan Uni of Aruba (CUA) a celebra cu hopi exito su evento anual di networking cu e titulo "Reality Check: Aruba's Growth & Housing Market" na Marriott Ballroom. E evento a resulta completamente sold-out y a reuni mas cu 200 invitado, incluyendo lidernan di gobierno, sector financiero, social, y priva cu empresarionan local pa un anochi di dialogo importante tocante futuro di Aruba, y tabatin combersacionnan profundo tocante crecimiento economico, vivienda, inversion stranhero, financiamiento y e impacto di Airbnb y turismo riba comunidadnan local. A hiba palabra Alex Cybul, Ministro Rene Herde, y como panelistanan tabatin Pierre Rafini di Asociacion di Bankero, y tambe Julie Wever di FCCA. Mas detaye na Pagina 2.



Exitoso actividad di Comerciantenan Uni of Aruba

Evento ‘Reality Check’ a reuni mas cu 200 persona y tabata completamente sold-out



ORANJESTAD (AAN): Comerciantenan Uni of Aruba (CUA) a celebra cu hopi exito su evento anual di networking cu e titulo “Reality Check: Aruba’s Growth & Housing Market” na Marriott Ballroom. E evento a resulta completamente sold-out y a reuni mas cu 200 invitado, incluyendo lidernan di gobierno, sector financiero, social, y priva cu empresarionan local pa un anochi di dialogo importante tocante futuro di Aruba.

E anochi a wordo presenta pa Erin Croes como anfitrion y moderadora oficial di e evento.

Durante e evento, e audi-

encia a haya e oportunidad pa scucha ‘keynote presentations’ y participa den conversacionnan profundo tocante crecimiento economico, vivienda, inversion stranhero, financiamiento y e impacto di Airbnb y turismo riba comunidadnan local.

Alex Cybul, un di e operatornan di Airbnb mas grandi na Aruba, a fungi como keynote speaker y panelista. Durante su presentacion, el a conta con el a cuminsa su trayecto empresarial y con su negoshi di Short-Term Rentals a logra crece na Aruba. Alex tambe a comparti su vision tocante crecimiento economico, oportunidadnan den mercado y e

impacto di Airbnb riba economia local.

Minister René “Baba” Herdê, minister encarga cu infraestructura, medio ambiente y desaroyo, tambe a fungi como keynote speaker y panelista, y comparti informacion tocante desaroyo di Aruba, vivienda, infraestructura y e reto di mantene Aruba accesibel pa localnan mientras cu e pais ta sigui creciendo.

E panel di e anochi tambe a conta cu Piere Rafini (President di Aruba Bankers Association), y Julie Wever (directora di FCCA).

“Reality Check” a crea un plataforma pa conversacionnan honesto, constructivo y relevante tocante e retonan y



oportunidadnan cu Aruba ta enfrentando actualmente.

Comerciantenan Uni of Aruba (CUA) ta un organizacion dedica na conecta, representa y fortalece comunidad

empresarial di Aruba. Actualmente, CUA ta conta cu 200 miembro, tur empresario y doño di negoshi activo den diferente sector di Aruba.





GET 1 MEDIUM PIZZA

CHOICE OF

BBQ CHICKEN

PEPPERONI FEAST

DELUXE | VEGGIES

AMERICAN FEAST

OR 2 TOPPINGS

— PLUS CHOICE OF —

2 LAVA CAKES

BREADSTIXS | CINNASTIXS

16 PCS PARMESAN BREAD BITES

3 MARBLED COOKIE BROWNIE

FOR 33.00 AWG

Excluding Delivery Charge



STA CRUZ
585 0333

PALM BEACH
586 0333

PARADERA
582 0333

SAVANETA
584 0444

BOULEVARD
583 0333

ORDER AT
DOMINOSARUBA.COM

Download on the App Store GET IT ON Google Play

Parlamentario Shailiny Tromp-Lee:

Transparencia no ta un favor cu un Minister ta haci Parlamento

- *E ta un obligacion legal y moral*
- *Ningun claridad ainda riba e biahe di jet*

ORANJESTAD (AAN): Parlamentario Shailiny Tromp-Lee ta recorda pueblo cu, despues di varios luna, ainda Parlamento di Aruba ta en espera di claridad y transparencia total di parti di Minister Gerlien Croes tocante e uzo di un jet priva pa un biahe oficial pa Corsou. Tromp-Lee ta enfatisa cu den un estado di derecho, integridad no ta wordo proba cu palabra, sino cu documento y facturación cu ta carga e berdad.

Cuater luna di silencio y versionnan contradictorio: Desde november 2025, ora e incidente a tuma luga, e mandatario a duna versionnan cu no ta cuadra cu otro. Prome a wordo bisa cu e mes a paga, despues cu e tabata un "lift" y finalmente cu e gastonan a wordo comparti.

"Aruba no por tin un gober-

nacion basa riba confusion. Ora un mandatario cambia su storia tres biaha, e unico forma pa recupera confianza ta door di presenta e prueba di pago real. Te cu awe, e Minister a scoge pa keda den silencio of sconde tras di argumentonan fofo pa no duna e informacion cu Parlamento a pidi formalmente," Tromp-Lee a declara.

Costo di Bida vs. Luho In-necesario: E falta di transparencia aki ta bira mas grave ora mira e realidad di nos isla. E costo di bida na Aruba ta subi-endo dia pa dia, y famianan mester conta tur cen pa cubri nan gastonan basico.

Den e contexto aki, e uzo di un jet priva pa un buelo di apenas 20 minuut ta un acto cu ta falta solidaridad cu e pueblo. Segun e Parlamentario, un lider mester duna e ehempel

di austeridad y uzo responsabel di tur recurso, sea publico of personal, ora ta trata di asuntonan di estado.

Palabra so no ta basta, pueblo kier mira prueba: Tromp-Lee ta reitera cu e obligacion di un minister ta pa rindi cuenta. E nengamento di contesta preguntanan di Parlamento y e blokeo di peticionnan pa informacion ta crea un ambiente di duda cu no ta sano pa nos democracia.

"Nos no ta pidiendo opinion di e Minister, nos ta exigiendo e documentonan: e factura di e compania di aviacion y e prueba bancario cu e pago a sali efectivamente for di su cuenta personal. Transparencia real ta nifica stop di papia y cuminsa mostra e papelnan. Pueblo tin derecho di sa e berdad completo riba e biahe aki y si a cumpli cu tur regla di integridad," e Parlamentario a enfatisa.

Parlamentario Shailiny Tromp-Lee a conclui bisando: "Transparencia no ta un



favor cu un Minister ta haci Parlamento, e ta un obligacion legal y moral. Si e Minister no tin nada di sconde, e mester presenta e pruebanan awe mes. Palabra so no ta basta mas; pueblo kier mira e recibo."

Polis a detene agresornan di caso di hincamento den De La Sallestraat



ORANJESTAD (AAN): Central di Polis a ricibi Diahomingo marduga e informe, cu na e T-weg di De La Sallestraat hunto cu Kamerlingh Onnestraat tin un caso serio di pelea andando riba caya.

Mesora unidad di Polis di Playa a mobilisa pa e lugar, y ora cu a yega, a bin nota cu un persona a haya hinca na su curpa, y asina a core solicitá pa presencia di Ambulans tambe.

Polis a cuminsa check e situacion, y a pone man riba algun agresor cu tabata envolvi y cu lo ta responsabel

pa hinca e victima. No ta conoci exactamente cuanto hende a keda deteni.

Ambulans a yega y a core atende e victima, pa asina purba stop e sangramento, y prepara pa bay cu ne rumbo pa Servicio di Emergencia na Hospital. A haya informacion cu lo por tin un victima cu herida na su curpa, pero e lo a bandona e area y no a mire mas.

Polis a bay cu e detenidonan pa Warda di Polis pa asina un investigacion wordo haci riba e causa di e pelea cu a escala den bringamento.

Otro ganador di jackpot di Lotto di Dia a busca su premio



ORANJESTAD (AAN): Diahuebs siman pasa den oranan di anochi, e sorteo di Lotto di Dia a produci e numbernan 05, 14, 17, 24, y 25.

Esaki ta exactamente e numbernan di un ticket loco cu Argenis tabatin.

Pesey mes riba Diabierna el a acudi na oficina di Lotto pa reclama su premio. Despues cu e funcionaria a revisa e ticket, a scan e barcode y esaki a confirma cu Argenis a gana e suma di 51.000 Florin cu tabata e jackpot

di Lotto di Dia.

Mesora a sigui cu e proceso pa transferi e premio electronicamente pa su cuenta di banco. Argenis a splica cu e ticket ganado a wordo genera y bendi na e mashin di Sheba Lottery.

Ronald a gana 2ndo premio di Mini Mega



ORANJESTAD (AAN): Den un recien sorteo di e popular Mini Mega, e cliente Ronald a ripara cu 4 number riba su ticket a sali, excepto e megaball.

Esey nifica cu el a gana di segundo premio, y riba Diabierna mes el a acudi na oficina di Lotto pa reclama su premio. Aki e funcionaria a revisa su ticket pa check si el a pone su firma

na e parti patras di ticket, y ora di scan e barcode, e computer a confirma cu el a gana e premio aloca di 22.487 Florin pa 2ndo premio di Mini Mega.

Mesora a procesa e premio y pas'e electronicamente pa su cuenta di banco. Ronald a splica cu e ticket ganador el a cumpra na oficina di Lotto na Oranjestad.

Fundacion Venezolano a manda gradici Ministro Dowers



ORANJESTAD (AAN): Recientemente Minister Arthur Dowers a ricibi un gradicimento caluroso di Fundacion Venezolanos Unidos en Aruba pa su apoyo continuo na comunidad migrante riba isla. E reconocimiento aki ta

refleha e importancia di dialogo, colaboracion y compromiso pa crea un ambiente inclusivo y sigur pa tur hende cu ta biba na Aruba.

Segun Ministro, hunto lo sigui traha pa un sociedad mas fuerte y mas uni.

Marceylaine Paskel, PR-DAS:

E Fase 2 di e Trayecto "In the picture" a cuminza pa pone teoria den practica

**E meta ta pa clientenan di bijstad pasa pa mercado laboral e prome fase.*

ORNJESTAD (AAN)-- E Fase 2 di e Trayecto "In the picture" a cuminza. Asina Marceylaine Paskel, Relacionista Publico di Departamento di Asunto Social (DAS), a duna di conoce den entrevista cu Matutino DIARIO.

Den esaki Stichting JA IK Aruba ta guia e clientenan na conoce diferente compania, pero e parti mas principal ta cu nan ta bay pone e teoria den practica, PR Marceylaine Paskel a splica.

"Cu esaki nos clientenan lo cuminza stage, di 1 pa



31 di Juni, unda nan lo conoce structura, nan lo cuminza custumbra cu e mercado laboral. Ban pon'e positivamente, nan ta bay keda unda nan lo bay", Paskel a exclama.

El a splica cu esaki ta e mesun grupo cu a termina

e prome fase.

"Mi kier a bisa si, cu mi kier a gradici Stichting JA IK Aruba y sigur tambe na DPL, cu ta forma parti di e trayecto aki, cu ta un trayecto transformativo cu lo cambia e bida di e clientenan, y esaki ta local DAS ta para p'e firmemente. Y nos ta sigui crea e bienestar pa henter e comunidad. Sigur tambe, un elogio pa nos profesionalnan, den DAS, cu ta traha incansable pa semper t'ey", Marceylaine Paskel, Relacionista Publico di DAS, a subraya.

ASISTENTE MECANICO

ABC Tours Aruba ta en busca di un **persona practico** pa asisti cu mantenimiento y servicio di Jeep/UTV.

- Experiencia practico
- Conosimento di hermentnan basico
- Ta dispuesto pa siña
- Trabou fisico
- Rijbewijs ta un plus



ULTIMO DIA PA APPLICA TA:
31 DI MEI 2026



SI BO TA INTERESA MANDA
BO CV:
heart@abcaruba.com



ASSISTANT MECHANIC

- Practical experience
- Basic tool knowledge
- Willingness to learn
- Physical work
- Driver's license is a plus

ABC Tours Aruba is looking for a **hands-on assistant mechanic** for maintenance and Jeep/UTV support.



DEADLINE TO APPLY:
MAY 31, 2026



IF INTERESTED PLEASE
SEND CV TO:
heart@abcaruba.com



ASISTENTE DE MECÁNICO

- Experiencia práctica
- Conocimientos básicos de herramientas
- Ganas de aprender
- Trabajo fisico
- Licencia de conducir es un plus

ABC Tours Aruba esta en busca de un **asistente práctico** para mantenimiento y apoyo en Jeep/UTV.



PLAZO:
31 DE MAYO DE 2026



PUEDES ENVIAR TU CV A:
heart@abcaruba.com

Estudiante Max Ng a representa Aruba na un competencia unda el a actua como Fiscal ta duna requisitorio



ORANJESTAD (AAN): E estudiante Max Ng a representa Aruba den e competencia “OM Nationale Requireerwedstrijd 2026” na Amsterdam, Hulanda. E ta un competencia prestigioso unda ta reta talentonan huridico riba tereno di derecho penal y dunamento di pleidooi, pues requisitorio.

Danki na un preparacion intensivo y un guia solido, Max a logra di presenta su mes na forma excelente, incluyendo dilanti un oponente cu hopi aña di experiencia. E competencia no a djis ofrece un reto intelectual, sino tambe perspectivanan balioso riba e rol complica di un Fiscal.

“Husticia no ta blanco-preto, e ta rekeri perspectiva, equilibrio, y responsabilidad”.

Un gradicimento special na Facultad di Derecho,



Ministerio Publico di Hulanda, y docente Ruth Bonnevalle pa nan sosten y guia.

Max ta animando demas studiantenan: “E ta

un experiencia cu ta ponebo crece tanto den parti huridico como tambe ta yudabo crece den bo persona.”

President di Fundashon Ultimo Deseo Aruba a bishita Gobernador interino



ORANJESTAD (AAN): Recientemente Gobernador Interino di Aruba, Agustin Vrolijk, a ricibi Sra. Renate Raven, Presidente di Fundashon Ultimo Deseo Aruba (FUDA), pa un audiencia.

E tabata un reunion di introduccion, durante cual e discusion a enfoca particularmente riba e obhetivonan di e fundacion, e forma cu nan ta purba di duna substancia na esakinan, y e retonan cu nan ta experiencia den practica.

FUDA ta cumpli e ultimo deseonan, sin cobra gasto,

pa personanan inmobil y terminal na Aruba, sin importa nan historia social of cultural y/of nan status. FUDA su mision ta pa duna cada persona terminal na cama e atencion cu e merece, pa preveni cu e persona fayece sin haci un ultimo deseo realidad.

Door di experiencia e evento aki nos kier hisa e calidad di bida den e ultimo periodo ey, pa trece sikiera algun luz pa e persona mes y su hendenan den e ultimo dianan. E potret aki pa cortesia Kabinet Gouverneur Aruba.

STERILISA BO MASCOTA

**Por favor registra online
via e QR code**

WhatsApp +297 5667 585



YUDA NOS CONTROLA E SOBREPULACION AWE

AWAA

Dia di Museo na MANA lo tin intercambio cultural, inspiracion, creatividad y paz




ORANJESTAD (AAN): Dialuna otro siman, esta 18 di Mei 2026, Museo Arqueologico Nacional Aruba (MANA) ta habri su portanan pa celebra Dia internacional di Museo 2026 cu un orario adapta. E dia lo ta yena di programa

special y actividadnan varia pa publico. MANA lo habri di 9'or di mainta pa 9'or di anochi y ta invita tur hende pa bin hunto y celebra un atardi y anochi special. Entrada ta completamente gratis

ICOM (Conseho Interna-

cional di Museo) a stipula e tema pa Dia Internacional di Museo 2026: "Museonan cu ta uni un Mundo Dividi". E meta di Dia Internacional di Museo ta pa crea consciencia cu "Museonan ta un medio importante pa intercambio cultural y pa e desaroyo di comprendimento mutuo, cooperacion y paz." ICOM ta encurasha museonan pa durante Dia di Museo 2026 crea experiencianan acesibel pa publico y pa demostra nan compromiso na unidad, dialogo y paz.

Cuminsando e dia, e programa 'Nos Mainta' lo transmiti en bibo for di MANA via TeleAruba pa comparti cu co-



Site in Aruba". E prome session lo ta pa 3'or di atardi y e di dos pa 6.30' or di anochi.

Exposicionnan temporario tambe lo ta habri y algun di e artistanan lo ta presente pa intercambia cu publico. Bernadette van der Klooster lo duna su Artist Talk impresionante y e artistanan hoben cu a expone den e exposicion colorido y caluroso "Parha di Aruba" tambe lo duna in-

y 7.30'or di anochi tin oportunidad pa esnan cu ta desea pa presenta durante un ora di 'open mike'. Lo tin algun pasa boca y coi bebe y actividadnan interactivo pa famia.

MANA ta invita henter comunidad di Aruba pa bin celebra Dia Internacional di Museo dia 18 di mei, den un atmosfera di intercambio cultural, inspiracion, creatividad y paz.

Señora Swinda Dumfries di DVG

Scol Saludabel ta promove habitonan saludabel pa obesidad no bira parti normal den bida di nos muchanan

Obesidad ta bira un di e desafionan di salud publico mas grandi na mundo y tambe na Aruba. Cada aña, e cantidad di muchanan y adulto cu ta enfrente problemanan di sobrepeso y obesidad ta aumenta, treciendo consecuencianan serio manera diabetes, presion halto, problemanan di curason y dificultadnan emocional y social. Specialistanan ta alerta cu obesidad no solamente ta afecta e curpa, pero tambe e bienestar mental y emocional di un persona.

Pa combati e problema aki, e proyecto "Scol Saludabel" ta enfoca riba promove habitonan saludabel, alimentacion balancea y actividad fisico na scolnan di Aruba. E meta principal ta pa yuda muchanan y mayornan bira mas consciente di e importancia di un bida saludabel y crea habito positivo cu por dura pa bida.

Señora Swinda Dumfries di DVG a splica den un entrevista cu DIARIO cu obesidad no por wordo separa di e aspecto social y emocional. Segun e, "Scol Saludabel" ta pone enfasis riba alimentacion saludabel y movecion, pero tambe riba e desaroyo integral di e mucha. El a remarca cu alimentacion salud-



abel mester cuminsa na cas, aunque ta un aspecto cu DVG ta sigui duna atencion special den e programa.

Durante e Siman Saludabel di siman pasa, cu a wordo considera un exito, mayornan tambe a wordo activamente involvi. Esaki a muestra cu scolnan, mayornan y comunidad hunto por contribui significativamente na salud y bienestar di muchanan. Cu apoyo y participacion di mayornan, muchanan ta haya mihor guia pa crece cu disciplina, conocimiento y conciencia tocante nan salud.

E base mas fuerte di cada mucha ta su salud y bienestar. Ora muchanan for di jong siña come saludabel, haci movecion, sa con pa trata otro y maneha emocionnan na forma positivo, nan tin

mas oportunidad pa crece mas fuerte, mas feliz y cu mas seguridad den nan mes.

Obesidad no mester bira parti normal den bida di nos muchanan. Hunto como mayornan, scolnan y comunidad, nos tin e responsabilidad pa guia y proteha nan cu habitonan saludabel, movimiento y bon alimentacion, pa nan por crece fuerte, feliz y cu un futuro mas saludabel.

Señora Dumfries a enfatisa cu esaki ta un responsabilidad principalmente di mayornan, cu ayudo y sosten di scolnan, instancianan concerni cu mucha y tambe Gobierno di Aruba. "E meta principal ta pa aporta na crecimiento di nos muchanan den un 'One Happy Island' di berdad," el a expresa.



**TRABOU DI MANTENCION DURANTE
SIMAN DI 11 PA 15 DI MEI 2026**
Interupcion di Coriente Planea

En conexion cu trabounan necesario pa mantene un suministro di coriente confiabel, e suministro di coriente lo wordo interumpi:

Diamars, 12 di mei 2026
8:30 AM te cu 3:30 PM

Underground Services

Den vecindario di:
• Palm Beach (un parti)

Diamars, 12 di mei 2026
8:30 AM te cu 3:30 PM

Overhead Services

Den vecindario di:
• Booby Hillweg
• Bottom Hillweg
• Great Hillweg
• Parish Hillweg
• Rooi weg
• Weg Fonteijn (un parti)

Bishita www.elmar.aw pa mira e lista di adresnan afecta.
Danki pa e comprension.


ELMAR

Marceylaine Paskel, PR-DAS:

Tin mamanan soltero cu tambe ta sigui e trayecto “In the picture” impulsa pa DAS

**Motivando clientenan di bijstand pa subi mercado laboral*

ORANJESTAD (AAN)--Marceylaine Paskel, Relacionista Publico di Departamento di Asunto Social (DAS), den su entrevista cu Matutino DIARIO, a sigui relata cu den e grupo di clientenan cu ta ricibi bijstand, tambe tin mamanan soltero cu ta participando den e trayecto “In The Picture”, cu tin e meta di yuda nan subi e mercado laboral.

“Mi por bisa cu nos a pensa riba nan, mirando cu hopi biaha e mama soltero no tin e parti di crèche pa keda



cu nan yiu. Dus, nos a facilita esaki conhuntamente cu Ja IK Aruba, mirando e posibilidad cu nan por crea tempo pa por bin na e trayectonan, pasobra nan

mester a bin tur diamars y diahuebs. E ta costa tempo, y e ora ey no por a duna un lugar sigur”, señora Paskel a indica.

El a sigui bisa cu e trayecto

aki ta hopi bon; nos a mira caba clientenan cu a drenta den e mercado laboral, den e transcurso di tempo aki, y aworaki nan lo cuminsa cu stage, unda cu lo cuminsa bek cu structura, e manera con nan lo cuminsa traha, etica laboral, y tur esaki cu nos ta custumbra y yega drenta bek”, Marceylaine Paskel a señala.

El a añadi cu DAS ta keda den contacto cu nan, y como sosten y guia social tin trahadornan social cu ta keda pendiente di nan clientenan, pero tambe como

parti di investigacion semper ta keda den bon comunicacion cu nan.

“Mi ta invita tur persona cu ta sinti cu ta tempo pa un cambio, cu nan kier transformacion nan bida, semper por acudi na nos localidadnan pa guia social, of si nan tin sosten financiero y nan kier bin nan ta bon bini. Nos ta kere semper den empoderar nos clientenan, empoderar e comunidad y semper nos ta man habri pa sostene esaki”, Marceylaine Paskel, PR di DAS a reitera.

Riba Dia di Mama

Restaurantnan tabata yen tanto den dia y anochi

ORANJESTAD (AAN): Aunke ta bisa cu prijsnan a subi, toch ta hopi Arubiano a proba di ‘specials’ cu varios restaurant a ofrece riba Diadomingo, cu ta Dia di Mama.

“E dia cu hende no ta cushina na cas”, a laga hopi hende sorprendi, pasobra a kere cu e situacion economico y cartera preta lo pone cu ta poco hende lo bay come.

Restaurantnan tabata yen ya for di merdia caba, cu parkinglot yen te cu automobilistanan mester a busca otro lugar pa staciona auto. Restaurantnan cu normalmente no ta habri den dia, a dicide



na busca nan team cu animo, y hasta extra waiters pa asina

atende e fluho di cliente cu a acudi. Hasta doño di res-

taurant por a mira ta atende publico.

E ta demostra cu aunke kizas inflacion ta atacando pueblo, toch bo mester sa di duna balar pa bo Mama, y hibe na un bunita lugar pa come. Y varios negoshi a ofrece mamanan un bunita regalo, e.o. rosa, cupcake, sangria, y tambe kelki di biña gratis.

Palabra di pabien na comerciantenan, specialmente esnan den servicio di cuminda cu a sa di haci algo special pa Mamanan, y sorprendentemente publico a acudi masalmente.

Segun opinion di un mayor:

Tin studiantenan ta haya cu e Examen cu esnan di MAVO a haya ta hopi dificil

ORANJESTAD (AAN) Un mayor a tuma contacto cu DIARIO, pa comenta cu e central examen cu a bini di Hulanda pa alumnonan di MAVO Examen Klas, ta sumamente dificil.

El a comenta cu su mes yiu a yega mas Diabierna, despues di e examen di e dia ey, masha cansa, cu stress y un dolor di cabes hopi pisa.

El a bisa cu su yiu a prepara su mes cu otro companeronan di klas, studiando

dia tras dia te anochi, cu tur voluntad y deseo di haya un bon resultado, pero ora nan a haya test e tabata hopi largo, cu no suficiente tempo pa cab’e tranquil, y e ta sinti cu no tur ehercicio e por a traha manera mester ta.

Na final, scuchando comen-tarionan di otro alumnonan, el a ripara cu nan tambe a sali di scol desapunta, y cu e Hulandes ta hopi mas dificil di loke nan ta haya den les na scol.

El a comenta esaki na DIARIO pa wak si tin mas mayor cu tambe lo reacciona, kizas riba su mes reaccion, pa wak si bal la pena acerca Departamento di Enseñanza cu e keho cu nan yiunan tin, y kizas en busca di un solucion si e resultado final ta stroba nan yiunan slaag. Hop di e studiantenan aki kier drenta Colegio EPI, y nan kier pa esaki bira posible.

AD PTA MI!

AMI TA KAMI

MI TA UN PASTOR HULANDES (RESCATA) DI 1 AÑA.

MI TIN HOPI ENERGIA Y UN KARAKTER FUERTE. MI TA GUSTA HUNGA, CORE Y BULA.

MI TA DUNA HOPI SUNCHI Y MI LO STIMA BO Y CUIDA BO PA SEMPER.

MI MESTER UN DOÑO CU TIN HOPI PASENSHI, TEMPO PA CANA CUMI Y TRAIN MI.

UN CAS SIN MUCHA Y SIN PUSHI CU CURA HALTO Y BON SERA PA MI NO HUY.


PA MAS INFO, YAMA 562-8755 (INTERESADONAN SERIO SO!)

Mañan pa 7 ora largo varios cas na Weg Fontein y Rooiweg lo no tin coriente

ORANJESTAD (AAN): Compania NV Elmar lo ta haciendo trabao di mantenimiento riba e grid di coriente den e barionan aki Pariba di Brug. A compromete cu siman pasa tabatin storing cu a laga algun area sin coriente.

E biaha aki, e trabaonan lo socede riba Diamars 12 di Mei 2026, for di 8:30 am te cu 3:30 pm. Pa siete ora largo, lo no tin coriente den e siguiente barionan.

Adresnan na Weg Fontein 58, 60, 64, 66, 66-A, 68, 71, 72, 73-A, 76, 79, 81, 81-A, 82, 83, 85, 85-A, 86, 87, 87-A, 89, 89-A, 90, 91, 94, 94-A, 95, 95-A, 95-B, 95-D, 96, 97, 98, 98-A, 98-B, 98-C, 100, 102, 112, 112-B, 112-C, 112-F, 112-G, 112-H, 113, 115, 115-C, 117, 118, 119, 120, 126, 128-A, 128-C, 128-F, 128-G, 128-I, 128-J, 130-B, 132-C, 133, 134, 134-A, 134-E, 135-A, 136, 137, 138, 138-B, 140, 145, 150, 152, 152-B,



152-C, 152-D, 152-E, 154, 154-A, 154-D, 158, 158-B, y 160.

Adresnan na Rooiweg 3, 4, 5, 6, 7, 8, 9, 10, 11, 12, 13, 14, 15, 16, 17, 18, 19, 20, 22, 23, 24, 26, y 30. Tambe tin Parish Hillweg 1-C, 5, 6, 11, 12, 12-B, 13,

15, y 16.

Adres na Booby Hillweg 1, 3, 4, 5, 6, 7, 8, 9, 10, 11, y 12. Adresnan di Bottom Hillweg 9, 17, 17-A, 17-C, 17-D, 22, 26, y 27. Finalmente adresnan na Great Hillweg 5, 6, 8, 10, 17, y 23.

Chauffeurnan disgusta cu prijs halto di gasolin na Republica Dominicana

SANTO DOMINGO: Gobierno di Republica Dominicana ya no por sigui "subsidiar" prijs di gasolin y diesel na e pais. Esey ta loke nan a bin ta haciendo pa varios luna largo caba.

Pero awor e tensionnan na Medio Oriente a pone prijs di crudo subi exponencialmente, y esey a pone cu na e pais di merengue tambe prijsnan di gasolin, diesel, y LPG gas a subi.

Esaki a bin dal e chauffeurnan trahando den Transporte Publico hopi duro mes. Paso-bra Diesel a subi, pero tarifa di core den bus y taxi a keda mescos pa e rutan principal di zuid, oost, Cibao, y

Gran Santo Domingo.

Chauffeurnan na keho ta prijs di gasolin ta hopi halto, demasiado halto, y loke nan kier ta pa prijs di gasolin baha, pasobra el a keda subi so. Nan no por hisa tarifa, pues esey ta pone nan den hopi desventaja.

Den pasado coriendo

e ruta di Elias Piña pa Santo Domingo, chauffeurnan tabata gasta solamente 3.000 Pesos. Pero awor nan tin di gasta entre 5.500 pa 6.000 Pesos. Gasolin premium ta na 323,10 Pesos (como 9,82 Florin) pa galon, Diesel ta na 275,10 Pesos (como 8.36 Florin) pa galon.



E Bon Noticia

Cremacion di curpa di un defunto ta prohibi pa Dios Tata

Skirbi pa: Seferino Tromp

Nos por mira claramente cu den Bijbel e tradicion di Israel, e hudiunan ta dera semper nan curpa morto. Mientras cu den mundo tin pueblonan den creencianan paganismo, den reencarnacion y nan si ta crema y ta kima nan curpa morto. Tin paisnan na mundo no ta permiti cremacion di curpa. Bijbel ta bisa, cu nos curpa ta bira stof manera cu mester ta durante tempo, pero Bijbel no ta bisa, cu nos curpa ta bira shinishi pa medio di kimamento di curpa.

Den Bijbel Genesis 3: 19, Dios Tata ta bisa: "Cu sodo di bo frenta lo bo come pan te dia cu bo bolbe den tera, pasobra ta di eynan bo a worde saca. Pasobra di stof bo ta y di stof bo ta bolbe bira."

Bijbel Ecclesiastes 12:7 ta bisa: "Bo curpa ta bolbe bira stof, ta bay back den tera y bo alma ta bay back na Dios, pasobra ta El ta esun cu a duna b'e." E tradicion di deramento di curpa, ta worde demostra den Bijbel Testamento Bieu y tambe den Testamento Nobo. Lesa loke Bijbel ta bisa den 1 Corinthionan 15: 44, Apostel Pablo ta bisa: "Ta dera un curpa mortal y un curpa spiritual ta lanta for di morto."

Den Bijbel Mateo 27: 59 y 60: "Hose di Arimatea a cohe e curpa di Hesus, a lor'e den un panja nobo di lenen y a pon'e den su mes graf. Tabata un graf nobo cu el a laga coba den baranca." I tin hopi mas capitulonnan den Bijbel cu ta papia di deramento di curpa y no di kimamento di curpa. Pa medio di bautismo, nos curpa ta tempel di Dios Spirito Santo cu ta biba den nos y ta haci nos curpa un instrumento di honor pa Dios Tata.

Por mira e curpanan di e Cristiannan y di e Santonan cu a muri hopi siglonan pasa y nan curpa a keda intacto, incorumpibel pa motibo di nan bida santo. Por ehempel, San Padre Pio, Sta. Bernadette Soubirous, Sta. Cecilia, San Huan Bosco, San Juan Vianney y hopi mas defuntonan cu a muri y nan curpa a keda incorumpibel, den Bijbel e salmo 16: 10 y 11 ta bisa: "Pues Bo no ta entrega mi alma na morto, ni Bo ta laga mi curpa sufri corrupcion. Bo ta mostra mi e caminda di bida, e goso grandi cu ta di mira Bo Cara, delicianan pa eternidad banda di Bo."

Pesey ta con un famia ta laga crema curpa di nan ser stima y mientras cu Cristo-Hesus kier pa curpa di hende keda incorumpibel pa motibo di nan bida Cristian y santo? Cristo-Hesus mes a worde dera y E'l a lanta Su mesun curpa for di morto, p'esey tur hende Cristian ta kere cu nan deramento den santana ta un testimonio pa e Resurreccion cu tin di bini. Nos curpa ta tempel di Spirito Santo y p'esey nos curpa mester worde trata cu honor y cu respet. Ta con un famia lo bay sinti, cu nan ser stima a pasa pa medio di candela ardiente y a bira shinishi?

Na aña 1886, e Santo Oficio di Vaticano a prohibi e cremacion di curpa na e funerarianan. Na final di siglo 19, tabata tin lantamento y protestanan di hendenan no Catolico na Europa pa promove e cremacion di curpa. E Iglesia Catolico a rechasa e movimientonan aki, pasobra e hendenan aki cu ta defende cremacion, nan tabata rechasa e creencianan Cristian di inmortalidad di alma y nan no tabata kere den e resurreccion di curpa. E Codice di Derecho Canonico di aña 1917, Iglesia Catolico ta prohibi un deramento Cristian, na cualkier persona cu a ordena pa su curpa worde crema.

Na aña 1963 Vaticano a cuminsa permiti cremacion di curpa, solamente ora un persona muri den enfermedad di epidemia, na paisnan na unda cu no tin lugar pa dera y na ora di desasternan y guerra. E Codice di Derecho Canonico actual di aña 1983 den e Canon 1176 ta bisa: "Iglesia Catolico ta conseha su fielnan, pa conserva e piadosa costumernan di deramento di curpa di e defuntonan." Awor, ta e famianan ta keda responsabel, si ta dera nan defuntonan manera cu Dios Tata kier of manera e otro creencianan di mundo ta haci. E responsabilidad aki ta keda pa cada un di nos dicidi segun su consenshi.

Kico Aruba mester di DVG pa Hantavirus aworaki

Skirbi pa: Jayburtt Dijkhoff, PhD

Poco riesgo no ta cero riesgo - y Aruba merece sa e diferencia.

Tres morto. Un tripulante di vuelo den isolacion na Amsterdam. Un virus cu por biaha silenciosamente durante seis siman. Un conexion directo cu Schiphol via KLM dario.

DVG a reacciona.

Pero no a conta nos tur e historia.

Jayburtt Dijkhoff, Doctor den Ley di Derechon di Salud y Presidente di Fundacion SIKI, ta pidi DVG y gobierno pa actua awor — cu precision, cu transparencia, y cu respet pa un pueblo cu por google.

ARUBA ta conoci mundialmente como un di e destinacionnan turistico mas sigur y mas hospitalario den Caribe. Esey ta algo cu nos por ta contento y orguyoso di dje. Nos a construi esaki cu sacrificio, cu trabou, y cu e confiansa di turista cu ta scoge nos isla tur aña.

Esey ta pakico tambe e situacion actual di Hantavirus - y mas especificamente, locual DVG a comunica tocante dje - ta merece atencion serio di nos tur.



Locual a pasa y pakico ta importante pa Aruba: Recientemente, un brote di Hantavirus a surgi den conexion cu e crucero MV Hondius, cu a sali for di

Argentina na April 2026. Te cu awor, tres persona a fayece. Un tripulante di vuelo ta den isolacion na Hulanda, batayando pa su bida. Autoridadnan di salud den cuatro continente ta rastreando pasaheronan activamente. E Organizacion Mundial di Salud (WHO) y e CDC ta sigui e situacion hopi di cerca.

E variante specifico aki ta yama e Andes-virus - y e ta unico den su clase, pasobra esaki ta e unico variante cu por transmiti di hende pa hende.

Aruba no ta den cercania di e brote berdad. Pero Aruba no ta leu for di e storia aki. Nos tin un aeropuerto internacional. Nos tin vuelonan diario cu KLM conectando Aruba directamente cu Amsterdam Schiphol - precisamente e hub cu ta conecta nos cu e zona di e brote.

E riesgo? E virus tin un periodo di incubacion di te 6 siman. Kiermen e preocupacion no ta un persona cu ta 'malo' of cu tin sintoma. E preocupacion ta e persona cu ainda no sa mes cu ta infecta, cu ta yega Aruba silenciosamente, y cu tin tur intencion di disfruta di nos beachnan y lama blou.

Pa un economia cu ta depende di cerca di 80% di su GDP riba turismo, segun cifranan di Banco Central di Aruba, nos no ta papia di teoria of un situacion leu di cas. Ta un asunto real, y nos como pueblo ta wak esaki hopi cla.

Locual DVG a haci bon - y locual falta:

Mester bisa bon cla: ta di aplaudi cu DVG a reacciona y a publica informacion riba e brote, y na diferente idioma. Esey ta importante y no ta algo trivial. DVG a provee informacion basico cu ta confiabel y a usa diferente canal pa yega pueblo. Esey ta un base cu merece reconocimiento genuino.

Pero como Doctor den Ley di Derechon di Salud y Presidente di Fundacion SIKI - cu ta trahando pa lanta e unico plataforma nacional di pashent na Aruba - mi obligacion ta pa bisa tambe locual a keda falta. Cosnan specifico, pero sumamente importante.

DVG no a menciona cu e variante specifico aki ta e version Andes - e unico cu por pasa di hende pa hende. Esey ta informacion critico cu ta cambia completamente con un ciudadano of turista mester evalua su propio riesgo.

DVG no a menciona e conexion di KLM. DVG no a duna ningun guia practico pa pasaheronan cu a bula for di of cu ta yega Aruba via Amsterdam entre fin di April y comienso di Mei. Kico nan mester tene cuenta cu ne? Ni un palabra. Kico nan mester haci? Kico y ki ora nan mester notifica?

Por ultimo, DVG no a priminti di duna un update. No tin ni fecha, ni compromiso pa comunica cu pueblo continuamente cua pasonan DVG y gobierno lo tuma den e siguiente seis siman nos dilanti. Esaki, mientras e periodo aki ta exactamente e bentana di riesgo científico.

E problema mas grandi no ta e brote - ta e credibilidad di DVG: Nos pueblo por google. Nos ta wak noticia internacional. Nos ta ripara e casonan di morto, nos ta lesa tocante e tripulante di vuelo den isolacion na Amsterdam, nos ta compronde locual WHO ta bisa tocante e variante Andes.

Ora cu nos wak tur esaki internacionalmente y djey nos ta lesa un comunicado local cu ta bisa "no tin motibo di preocupacion" - sin menciona e detayenan critico cu nos a caba di google - esey no ta calma ningun hende. Al contrario, e ta aumenta duda.

Esaki ta e berdadadero riesgo pa Aruba. Un sistema di salud publico cu ta perde credibilidad durante un momento di tension (aunke e tension ta manehabel) ta crea un situacion infinitamente mas peligroso cu e brote mes. Pasobra ora cu un situacion real y urgente presenta, e pueblo ya no ta scucha mas.

Esey ta un situacion cu por costa placa y bida, sin tin mester. Nos institucionnan mester ta fuerte. Y forsa no ta nenga riesgo. Forsa ta rekeri pa enfrentanan honestamente y ta transparente cu un Pueblo informa y cu merece di wordo trata como tal.

Kico Pueblo merece den e siguiente 48 ora y 6 siman: E yamada aki ta constructivo y concreto. DVG, y pa extension gobierno, tin e siguiente cuadra di oportunidad pa actua.

1) Pueblo merece un update oficial cada 48



ora pa tanto cu e situacion local como internacional. No un comunicado largo - djis un update cla, honesto, y cu fecha exacto.

2) Mester tin un briefing clinico na Horacio Oduber Hospital pa sigura cu personal medico por distingui entre sintomanan di Andes HPS y dengue of influenza, cu ta presenta cu sintomanan similar aki na Aruba.

3) Gobierno por pidi cooperacion cu KLM pa un screening voluntario di pasaheronan cu historial di biahe relevante prome cu embarke na Schiphol.

4) E sistema ED-Card por wordo actualisa temporalmente pa inclui una declaracion di biahe pa e siguiente 45 dia, especificamente riba crucero y rutanen di Zuid America y Zuid Africa.

5) Finalmente, mester tin un coordinacion cu e sector hotelero, pa asegura cu limpieza standard (cu ta elimina e virus facilmente) ta wordo aplica corectamente.

Esaki no ta un pandemia. No mester di un lockdown. Ta simplemente un prevencion proporcionada, specifico, y limita na tempo. Nada mas, pero nada menos.

Un palabra final na DVG y na nos pueblo: E era di acepta informacion incompleto ciegamente, a pasa pa historia. E standard di aworaki ta diferente - y ta razonabel cu e ta diferente.

Nos como pueblo merece un autoridad cu ta construi confiansa a travez di transparencia, no a travez di un calmo construi y p'esey obviamente artificial.

Pashentan y ciudadanonan ta organisa nan mes. Fundacion SIKI y e Plataforma Nacional di Pashent cu ta na caminda ta demostra esey. Nos no ta aki pa lucha contra DVG - nos ta aki pa traha hunto cu DVG y exigi e standardnan cu nos pueblo merece.

Den e siguiente 48 ora y e proximo seis siman, mi yamada na DVG ta simpel: asumi boso rol. Completo. Cu transparencia. Cu compromiso di comunicacion continuo.

Pueblo por google. Pero ta na DVG pa boga pa nos. Nos ta conta cu boso.

• Jayburtt Dijkhoff, PhD ta experto den derechon di salud, calidad di cuido y reflexion social, Autor di 'E Derechon di Pashent'.

Delcy Rodríguez a yega Hulanda pa representa Venezuela dilanti ICJ den e disputa cu Guyana riba e region di Essequibo

DEN HAAG: E presidente interino di Venezuela, Delcy Rodríguez, a yega Hulanda diadomingo pa dirigi e defensa di su pais den e disputa riba e teritorio Essequibo dilanti Corte Internacional di Husticia (ICJ) na Den Haag. Su biahe ta marca un momento clave den e disputa teritorial cu Guyana, den un arena internacional unda Caracas ta busca pa reafirma loke e ta yama su “derechonan historico” riba e region disputa. Asina tambe e lider chavista ta encabesa e delegacion Venezolano meymey di un contexto politico particularmente delicado despues di e detencion di e ex dictador Nicolas Maduro pa Merca.

Esaki tambe ta e prome biahe di e funcionario pafo di Caribe desde cu el a asumi e presidencia interino di Venezuela.

Rodríguez a anuncia den un discurso transmiti na television estatal cu su mision principal lo ta pa presenta e argumentonan di Venezuela dilanti di e Corte internacional y defende soberania nacional riba Essequibo, un area di aproximadamente 160.000 kilometer cuadra cu ta constitui alrederu di dos tercera parti di Guyana actual y ta contene depositonnan di mineral y deposito significativo di petroleo.

“Ta mi deber pa defende nos patria,” el a declara diasabra durante su discurso na televi-

sion. E funcionario a subraya cu su participacion personal den e audiencianan publico di ICJ ta reflehá e importancia critico cu Caracas ta duna na e disputa di frontera cu Guyana.

E procedura legal a cuminsa diabierna ultimo y lo sigui te dia 11 di mei. Durante e tempo aki, ambos delegacion ta presentando nan argumentonan dilanti corte, cu ta analisando e validez di e demandanan historico y huridico pa e region di Essequibo. E delegacion Venezolano, encabezada pa Rodríguez, lo wordo apoya pa un team huridico cu lo presenta loke e ta yama “e berdad y e motibonan historico” cu ta sostene e reclamo nacional riba e teritorio.

E intervencion di e mandatario interino ta bin despues di declaracionnan di e minister Venezolano di Relacionnan Exterior Yvan Gil, kende, papia for di Den Haag, a reitera e posicion oficial di su pais. Gil a afirma cu e unico manera legitimo pa resolve e disputa ta pa medio di negociacionnan directo entre e partidonan, sin intervencion di tercera parti. “E unico manera, cu ta unda e disputa aki lo termina, ta pa medio di negociacionnan directo, cara-cara, sin intervencion di tercera parti”, e Minister di Relacionnan Exterior a declara. Ademas, Gil a rechaza e argumentonan presenta



pa e delegacion di Guyana, yamando nan “negativo” y “repetitivo”, argumentando cu nan ta hasta nenga e funcion di Corte Internacional di Husticia mes.

E origen di e disputa teritorial entre Venezuela y Guyana ta data for di e Decision di Arbitrahe di Paris di 1899, cu a otorga soberania riba e region di Essequibo na loke e tempo ey tabata Guyana Britanico. Caracas a declara e sentencia aki nulo na 1962, alegando irregularidadnan den e procedimiento. Un di e abogadonan cu a representa Venezuela, Severo Mallet-Prevost, a documenta den un memorandum postumo e supuesto colusion entre e huesnan, cu el a afirma a motiva un decision desfavorabel pa Venezuela. Na 1966, tur dos pais a firma e Acuerdo di Ginebra, cu ta establece e buskeda di un solucion mutuamente aceptabel pa e disputa. Pa Caracas, e

acuerdo aki ta constitui e cuadro legitimo pa cualkier resolucion di e disputa.

Mientras cu ICJ ta analisa e argumentonan di ambos banda, e bishita di Delcy Rodríguez na Hulanda ta representa un movimiento diplomatico significativo di gobierno Venezolano. Caracas ta busca fortalece su posicion

na momento cu e disputa di Essequibo ta centro di atencion internacional y e frontera ta keda bao di estrecho vigilancia debida na aumento di actividad militar. E sentencia di Corte lo ta crucial pa determina e futuro di e disputa di hopi tempo entre e dos pais Sur Americano.

Fortaleza di Famia

Dialuna 11 Mei 2026

Haci oracion, persevera y ricibi bo milager

Skirbi pa: Pastor Marcel Balootje

Pa Dios nada ta imposibel, locual ta imposibel pa hende ta posibel pa Dios, Dios nunca ta laga hende bandona, Dios su misericordia ta grandi y tur dia e ta demostra esey di nobo pa nos.

Si bo ta kere den Dios, mantene fe den Dios, pasobra na e momento cu bo tin mas necesidad Dios ta presenta y ta yuda, no descurasha, un biaha mas no descurasha, pero para firme y mira e grandeza di Dios den bo bida.

Semper segura bo mes cu locual bo ta pidi ta den boluntad di Dios, y pidi Dios, pasobra e palabra di Dios ta bisa den Mateo 7:7: Pidi y lo wordo duna na boso, busca, y boso lo haya, bati y lo wordo habri pa boso. Pasobra ken cu pidi ta ricibi, y esun cu busca ta haya, y pa esun cu bati lo wordo habri.

Dios no ta cambia, tampoco ta bira moderno locual E a pone den su palabra, ta keda existi pa semper pasobra Su palabra no ta cambia.

Hende por bira egoista, orguyoso, rebelde y ta murmura cu un curason yena cu duda, pero Dios ta keda mesun cos, pesey E ta bisa den Su palabra, cu ken cu pidi ta ricibi.

Eynan nos ta mira cu bendicion, sanacion y liberacion di Dios, no ta mara na hende, pero na Dios su misericordia y su compasion.

Lanta ariba y haci oracion, pasobra Dios no ta wak color y cabey, ni tampoco nacionalidad, pero Dios ta wak nos curason y nos fe y nos sinceridad cual nos ta pidi cune.

Mescos cu un yiu tin derecho cerca su Tata, asina nos tur tin derecho cerca Dios, ora nos ta den Su boluntad. Pasobra e boluntad di Dios lo prevalece riba tur cos.

Marco 11:24 ta para skirbi, Pesey mi ta bisa boso, tur loke boso pidi ora boso ta haci oracion, kere cu boso ta ricibi, y e lo bira di boso.

Mateo 21:22 ta para skirbi: Y tur loke boso pidi den oracion, cu fe boso lo ricibi.

Jeremias 32:17 ta para skirbi: Ay Señor Dios, Mira ta Abo a traha e cielo y tera pa medio di bo gran poder, Y pa medio di bo brasa extendi! Nada ta mucho dificil pa Bo.

Jeremias 32:26-27 ta para skirbi: E ora ey palabra di Señor a yega na Jeremias, bisando: Mira, Ami ta e Dios riba tur carni: Acaso tin algo cu ta mucho dificil pa Mi.

No ta pornada e palabra di Dios ta bisa den 2 Timoteo 3:1-5 cu den e ultimo dianan tempo trabahoso lo bini, y tur e splicacion con hende lo cambia, con rebelde, hende lo bira, y con hende lo kier biba dos bida, y purba di haci manera nan ta cu Dios, pero nan curason ta leu for di Dios.

Cristo Hesus ta laga den Juan 14:13-14 palabra convincente den cual hende no por duda bisando: Y tur loke boso pidi den Mi nomber, Esey lo Mi haci. Pa e Tata wordo glorifica den e Yiu. Si boso pidi algo den mi nomber lo Mi haci'e.

Y esaki ta e confianza cu nos tin Su dilanti, cu si nos pidi cualkier cos conforme Su boluntad, E ta tende nos. (1 Juan 5:14).

Pesey laga nos acerca e trono di gracia cu confianza, pa nos ricibi misericordia, y haya gracia pa yuda den tempo di necesidad. (Hebreonan 4:16).

Cerca hende esaki ta imposibel, ma cerca Dios tur cos ta posibel. (Mateo 19:26).

Tur cos ta posibel pa esun cu ta kere.

Confia den Señor, y sigui haci bon.



Naturalesa ta papia...

Dos diferente anochi pa conoce mas di e matanan nativo di Aruba



ORANJESTAD (AAN): Despues di mondi di mangel, rifnan di coral, Lora y Cascabel, nos ta continua cu un grupo di especie cu ta esencial pa Aruba su ecosistema: e Matanan Nativo.

Matanan nativo ta forma un parti fundamental di nos

paisahe y ta duna sosten pa hopi otro forma di bida. Nan ta brinda sombra, y crea un habitat importante pa animalnan local.

Aruba Conservation Foundation ta bay tin dos anochi di lectura encuanto e matanan nativo di e isla. Nan

ta invita publico pa participa na e lectura gratis aki, di un otro edicion di ‘Encuentro di Conocemento’. Aki lo bo siña, comparti, y scucha kico e Matanan Nativo tin di bisa nos.

E prome anochi ta Diamars 26 di Mei 2026, na Centro di Barrio Dakota for di 6:45 pm te cu 8:45 pm.

E di dos anochi ta Diahuebs 28 di Mei 2026, na Teresita Center for di 6:45 pm te cu 8:45 pm.

E ta gratis, pero bo tin di registra prome online na e website aki:

www.bit.ly/matnativo

Ban lanta nos bos pa e Matanan Nativo y Aruba su naturalesa.

Un dama hoben di Aruba ta destaca den mundo financiero

Oriana Mansur a wordo premia cu e prestigioso 'Rising Star Award' na ciudad di New York



ORANJESTAD (AAN): Informacion for di New York ta indica cu un evento a ser teni recien pa un celebracion notabel di liderato, excelencia, y e futuro di muhenan den sector financiero, y aki e dama Oriana Mansur a wordo premia cu e prestigioso Rising Star Award, presenta door di Women's Bond Club.

E premio aki, cu ta wordo entrega durante un di e eventonan mas importantemente di e organizacion na Manhattan, ta reconoce profesionalnan emergente kendenan a demostra un liderazgo excepcional, cu logronan profesional, y cu e potencial di converti nan mes den bosnan di influencia dentro di e industria di servicionan financiero.

Funda na aña 1921, Women's Bond Club ta un di e organizacionnan mas bieu y respeta dedica na avance di muhenan den sector financiero y di servicionan financiero na New York City. Durante mas di un siglo, e organizacion a sirbi como un network solido di mentor, desaroyo di liderazgo, y crecimiento profesional, treciendo hunto checutivonan exitoso y profesionalnan cu ta creciendo di algun di e institucionnan financiero mas importante di mundo.

E premio di 'Rising Star' ta wordo otorga solamente na personanan selecta cu ta

destaca entre nan demas coleganan pa nan talento, dedicacion, calidad di liderato, y potencial pa futuro impacto den e industria. E programa ta goza di gran prestigio den comunidad financiero, y ta inclui coaching di liderato, oportunidadnan di network, y reconocimiento entre top checutivo y companianan di Wall Street y e sector financiero en general.

Pa Oriana Mansur, ricibimento di e premio aki no ta djis representa excelencia profesional, sino tambe e culminacion di hopi aña di trabao duro, determinacion, y compromiso cu e crecimiento den un sector cu ta hopi competitivo. Su reconocimiento ta reflesha e balornan cu Women's Bond Club ta defende: integridad, liderato, inovacion, y e avance di e futuro generacion di muhenan lider.

Famia, amigo-, y coleganan na forma di orguyo ta celebrando e logro di Oriana como un etapa cu ta destaca tanto su dedicacion personal como e briyante futuro cu ta sperando su dilanti. Pa wordo reconoci na New York City pa un organizacion asina historico y di influencia, ta pone wordo ubica den un grupo di elite di hobennan profesional cu ta yudando pa duna forma na e futuro di finanzas.

Mientras cu Women's Bond Club ta sigui cu su



mision di siglo-largo di empodera muhenan y fomenta liderato, e premio Rising Star otorga na Oriana Mansur ta sirbi como testimonio di e futuro generacion di profesionalnan cu talento cu ta lagando un impacto significativo den mundo financiero.

Oriana ta yiu muhe di director di DIARIO, Jossito Mansur.



Personal di WEB Aruba a bay honra varios mamanan cliente



ORANJESTAD (AAN): Siman pasa, como aprecio pa e mamanan cliente di WEB Aruba NV, e team di Customer Service hunto cu Gotito a sali cu bus, pa haci entrega di 'Gift Baskets' personalmente na 10 mama cliente di WEB, y nan a bay te na cas of trabao di e mamanan ganado, pa asina nan por disfruta riba Dia di Mama.

Tur cos a start ora cu a uza un computer cu sistema automatico pa saca 10 nomber di clientenan femenino.

E mamanan ganado a keda suma-

mente feliz cu nan regalo y tambe cu nan bishita di Gotito. Cada basket a inclui diferente regalo manera: gift certificate di awa di WEB, gift certificate di supermercado, gift certificate di gasoline, un bunita mata di Santa Rosa y algun regalito mas di WEB.

Cu e gesto bunita aki, WEB ta sigui muestra su aprecio y cariño pa nos clientenan y comunidad. WEB ta desea tur mama, principalmente mamanan di WEB, un Feliz Dia di Mama.

Grupo Scout Ora Ubao Aruba:

Scouting Aruba a celebra Dia di Jorge cu un marcha uniforma di 9 grupo scout di Aruba

- *Ilene Corsen a wordo instala oficialmente den e Hoofdbestuur*
- *Julisa Boekhoudt a ricibi un reconocimiento special*



ORANJESTAD (AAN): Scouting Aruba a conmemora cu orguyo e celebracion anual di Dia di Jorge, cu mundialmente ta ser celebra riba 23 di april. E dia aki ta dedica na San Jorge, patrono di tur scout, simbolo di balentia, perseverancia y servicio. Como parti di e celebracion, diasabra 25 di april 2026, Scouting Aruba a organiza un acto oficial cu participacion di 9 grupo scout di Aruba, incluyendo Grupo Scout Ora Ubao Aruba (GSOU).

E celebracion a cuminsa cu un marcha ordena for di punto di encuentro, sigui pa un ceremonia formal na Wilhelmina Park, unda tur grupo a bin hunto pa conmemora dia asina importante. E programa a inclui momentonan significativo manera renovacion di promesa scout, oracion door di Pastoor Jairo Maduro, historia di San Jorge y e instalacion di e Hoofdbestuur nobo pa e periodo 2026–2029. Presente na e ocasion tabata Prome Minister Mike Eman y Parlamentario Evelyn Wever-Croes kendenan a felicita y gradici Scouting Aruba pa e bunita trabao cu e movimiento aki ta haci den nos comunidad.

Grupo Scout Ora Ubao Aruba a expresa su gran

orguyo pa dos di su miembronan. Ilene Corsen a wordo instala oficialmente den e Hoofdbestuur como HKC Training en Vorming, un logro importante den su trayecto como lider. Tambe, Julisa Boekhoudt a ricibi un reconocimiento special pa su compromiso continuo cu Scouting Aruba desde su inicio te cu awor—cu ta un muestra di su dedicacion y servicio na scouting.

Scouting Aruba ta celebra 25 aña di existencia na Aruba. Pa e motibo aki tambe tur scout presente a ricibi un badge conmemorativo como simbolo di dedicacion di scout na Aruba.

E anochi a cera cu un kampvuur, creando un espacio di reflexion, fraternidad y contamento di storia. Durante e actividad, e historia di San Jorge a wordo comparti, reforsando e balornan fundamental cu e movimiento scout ta representa.

Scouting Aruba ta un plataforma di formacion integral pa hobennan, enfoca riba liderazgo, disciplina y compromiso social. Actividadnan manera esaki no solamente ta fortalece e union entre miembronan, pero tambe ta reafirma e impacto positivo di scouting den comunidad.

Ministro Gerlien Croes ta orguyoso di atletanan cu a representa Aruba durante CARIFTA Games 2026



ORANJESTAD (AAN): Den fin di siman, como debe ser Ministro di Deporte, Gerlien Croes a dicidi na mustra con orguyoso Gobierno ta di atletanan di atletismo y landamento cu a representa Aruba cu pasion y dedicacion durante CARIFTA Games 2026.

“Celebrando talento, perseverancia y orguyo Arubano,” ta e esencia principal cu Ministro a enfoca riba dje. “Como Minister di Deporte, mi a honra nos atletanan di atletismo y landamento pa nan tremendo desempeo durante CARIFTA Games 2026. Nan disciplina, sacrificio y dedica-

cion a pone bandera di Aruba na halto y a demostra cu nos hobennan tin un futuro yen di potencial.” Ministro a duna un reconocimiento special tambe pa coachnan, famianan y tur esnan cu ta sostene e atletanan den nan trayecto deportivo. E logro aki ta resultado di hopi trabou duro,

compromiso y amor pa deporte. Tur esaki ta un merecido reconocimiento pa nan esfuerzo, disciplina y e tremendo resultadonan cu nan a logra. Sigui briya y inspira nos comunidad y otro hobennan, sigui soña grandi y sigui representa Aruba cu orguyo.

Xeena ta conta con leuk e Siman di Salud na Scol Kudawecha tabata

ORANJESTAD (AAN)-- Un momento hopi agradabel y simpatico, DIARIO a pasa hunto cu e hobencita Xeena Dijkhoff, ken tin 9 aña di edad y ta ex-reina infantil di Carnaval 2024.

E ta alumno di Scol Primario Kudawecha,

na Noord, unda nan a celebra e Siman Saludabel.

E siman aki e alumnonan mester a bin cu un producto diferente, por ehemplo fruta, y e producto di diferente color cada bes, y cada dia tabata tin un actividad, manera dialuna

tabata tin Yoga y Diamars Sumba. Xeena a bisa cu tur e dianan aki nan a pasa SUPER LEUK!



Columna E Sembrado



Diahuebs 22 januari. Di dos siman den tempo ordinario aña 2026 Ciclo A

Calendario Liturgico

Lectura: 1 Samuel 18, 6-9; 19, 1-7;
Salmo: 56;
Evangelio: Marco 3, 7-12;

Hesus a retira hunto cu su discipelnan bay canto di lago di Galilea (Marco 3, 7)

Rumannan, awe den e Palabra di Dios, nos por lesa cu Hesus a retira hunto cu su discipelnan paso E tabata kier tin un tempo su so pa cu su discipelnan. Rumanan den nos tempo nos tambe mester busca manera di por retira for di nos bida di tur dia y busca un momento pa ta nos so cu Hesus. Nos tin cu retira for di tanto desordo, for di e bida druk, for di e ansha di tur dia y busca e silencio cu Cristo, busca e tranquilidad cu Cristo, busca pa retira for di e cosnan di mundo y drenta den e presencia di Hesus. Awe mi ta invita bo pa bo busca caminda pa Santisimo, busca e presencia di nos Señor den e silencio y permiti Hesus drenta den bo curason. Laga nos retira pa topa cu Hesus.

Oracion: Tata nos ta yama Bo danki pa muestra nos con importante e ta pa nos por retira for di tur cos y bay topa cu Hesus. Duna nos e deseo ferviente di ta den presencia di Cristo den Santisimo. Amen.

Grupo Centro Pastoral

Ministro Dowers a reuni cu Aeropuerto di Aruba

ORANJESTAD (AAN): Recientemente Minister Dowers a haci un bishita di trabou na Aruba Airport Authority (AUA), pa check con ta bayendo cu e operacion.

Ministro a topa cu Chief Executive Officer Jonny Andersen, representantenan di SITA y servicio di inmigracion, a ricibi un actualisacion riba e progreso di diferente sistema di seguridad na aeropuerto.

Durante e bishita, a papia riba e colaboracion entre e instancianan involucra y e desaroyo continuo riba area di seguridad y servicio den e entorno di aeropuerto.



Cancion yama 'Dai Dai'

Shakira a divulga fecha di estreno di e tema oficial di Mundial 2026



ORANJESTAD (AAN): Shakira a bolbe pone su nomber den centro di combersacion global despues di a anuncia e estreno di "Dai Dai", e tema musical cu lo wordo presenta como cancion oficial di Copa Mundial di FIFA 2026, cu lo tuma lugar na Canada, Merca, y Mexico.

E artista a confirma via su Instagram, cu e cancion lo wordo lanza oficialmente riba Diahuebs 14 di Mei 2026, y a hasta duna un preview audiovisual cu ya caba a cuminsa plama riba social media y cu a genera expectativa entre su siguidor-nan y fanaticonan di futbol.

Den e pida videoclip cu e cantante a muestra, por mira un produccion graba den Stadion Maracanã na Brasil, cu estetica deportivo y un coreografia diseña pa escenarionan masivo. E video a inclui elementonan visual tambe cu ta recorda riba su participacionnan anterior na mundialnan, reforzando Shakira su vinculo historico cu e tipo di eventonan aki.

Segun e artista a indica, e tema musical "Dai Dai" a wordo traha cu yudansa di Inteligencia Artificial (A.I.), cu ta un novedad den su produccionnan musical recien.

E cancion "Dai Dai" ta inclui frasenan cu ta ripiti, y ta facil pa bisa, manera "Dai dai, iko, dale, ale, let's go", cu ta muestra cu esey lo bay bira viral riba plataformanan digital y stadionnan durante weganan.

Un di e elementonan mas comenta di e lanzamiento ta e colaboracion cu Burna Boy, e artista di Nigeria reconoci pa su influencia den afrobeat contemporaneo. E union entre e dos artistanan aki ta reforza e intencion di construi un sonido global cu ta conecta diferente cultura cu

e torneo di futbol.

E strategia musical di e proyecto ta apunta na un tema cu hopi potencial comercial y viral, y lo ta perfecto pa ambiente den stadion como tambe social media, unda coreografia- y fragmentonan di cancionnan por bira rapidamente den tendencia.

Shakira no ta nobo den e universo musical di FIFA. Su relacion cu copanan mundial a cuminsa desde 2010, ora cu el a canta 'Waka Waka (This Time for Africa)' cu a bira tema oficial di e mundial di Zuid Africa, cu a bira un di e gran exito global di su carera.

Na 2006 el a participa den e clausura di e Mundial di Alemania cu "Hips Don't Lie", mientras cu na 2014 el a lanza "La La La (Brasil 2014)", inclui den e album oficial di e torneo na Brasil. E participacionnan aki a consolida Shakira como un di e artistanan mas asocia cu e historia musical di Copanan Mundial.

Loke "Dai Dai" nifica: E expresion italiano 'Dai Dai' por wordo traduci manera "ban, ban", "bay p'e", y "animo"... cu ta un frase uza pa motiva of empuha hende pa sigui bay dilanti, hopi liga cu e espiritu competitivo y emocional di futbol.

E letra tambe tin un tono emocional y di superacion. Fragmentonan manera "Lo que una ve te rompió te hizo fuerte" ta muestra riba resiliencia, un concepto cu por wordo relaciona tanto cu e deportistanan como tambe e trayectoria recien di e cantante di Colombia.

Pesey varios fanatico ta interpreta cu e cancion no ta djis busca pa anima e seleccion- y fanaticonan, sino e ta transmiti un mensahe di fortaleza y union.



#Futbol

'Dai Dai'

Song by Shakira
FIFA World Cup 2026



Oh-eh-oh-eh, eh-oh-eh
Oh-eh-oh-eh, eh-oh-eh
Knew from the day you were born
Here in this place, you belong
You've been this brave all along
What broke you once made you strong.



Dai, dai, we go, dale, ale, let's go
Dai, dai, we go, dale, ale, let's go
Dai, dai, we go, dale, ale, let's go
Dai, dai, we go, dale, ale, let's go
Oh-eh-oh-eh, eh-oh-eh
Oh-eh-oh-eh, eh-oh-eh

Supé desde el día en que naciste
Que aquí es donde perteneces
Has sido valiente todo este tiempo
Lo que una vez te rompió te hizo fuerte.



Dai, dai, vamos, dale, ale, vamos
Dai, dai, vamos, dale, ale, vamos
Dai, dai, vamos, dale, ale, vamos
Dai, dai, vamos, dale, ale, vamos

DEPORTE INTERNACIONAL

Thunder un biaha mas a suta Lakers y ta cerca di bay final di Western Conference




LOS ANGELES: Mescos cu den e di dos wega di e serie di playoffs Los Angeles Lakers halftime tabata ganando y mescos cu den e wega ey Oklahoma City Thunder a bin bek fuertemente pa gana e di tres wega. Ajay Mitchell tabata maximo anotador cu 24 punto y 10 asistencia, pa yuda OKC gana e wega 131-108. Cu e victoria aki Thunder tin un ventaha di 3-0 y falta 1 triunfo mas pa pasa pa e final di Western Confer-

ence.

Shai Gilgeous-Alexander a contribui pa Oklahoma City cu 23 punto y 9 asistencia.

Di otro banda e maximo anotador pa Los Angeles tabata Rui Hachimura cu 21 punto y 5 rebounds, mientras cu LeBron James a contribui cu 19 punto, 6 rebounds y 8 asistencia y Austin Reaves a caba cu 17 punto y 9 asistencia

Chens pa Ajax participa na clasificacion pa champions League a bira chikito despues di perde contra FC Utrecht



AMSTERDAM: Apesar di cumin- sa e temporada basta malo, yegando final di temporada ainda Ajax tin chens pa caba suficiente halto den e standings di Eredivisie, pa hunga proximo temporada den e rond- nan di clasificacion pa Champion League.

E chens sinembargo a bira bastante mas chikito, despues cu Ajax a perde e penultimo wega di temporada.

E club di Amsterdam Diadomingo a perde 2-1 contra FC Utrecht y awor faltando 1 wega pa temporada yega

y spera cu FC Twente perde y NEC empata of perde.

E prome gol di Utrecht a wordo anota pa Niklas Vesterlund den di 81 minuut y apenas 3 minuut despues Wout Weghorst a empata e wega pa Ajax.

Te den di 96 minuut Mike van der Hoorn a anota e gol ganador pa Utrecht cu logrando e triunfo aki ta pasa pa e playoffs pa di Conference League.

su final Ajax ta na di 5 lugar di e campeonato Hulandes, 1 punto tras di NEC y 3 punto tras di FC Twente.

Pa pasa pa e rond di clasificacion di Champions League Ajax lo mester termina na di 3 lugar, pues nan mester gana nan ultimo wega

Mitchell cu 35 punto pa yuda Cavaliers gana Pistons



CLEVELAND: Despues cu den e dos prome weganan di e playoffs di Eastern Conference Cleveland Cavaliers a cay den otro y perde, Diasabra porfin nan a logra gana Detroit Pistons, pa pone e serie na 2-1 ainda na favor di Detroit.

Den e ultimo tres minuutnan Cavaliers a haya hugadanan clave for di James Harden y Max Strus.

Harden tabata tin 3 anotacion grandi y Strus a horta e bala y na dado momento a duna Cleveland un ventaha, pa nan final nan gana e wega 116-

109.

Donovan Mitchell tabata maximo anotador pa Cleveland cu 35 punto y 10 rebounds, mientras cu Harden a contribui cu 19 punto y Jarrett Allen a termina cu 18.

Di otro banda e maximo anotador pa Pistons tabata Cade Cunningham cu 27 punto, 10 rebounds y 10 asistencia, mientras cu Tobias Harris a termina cu 21 punto y 5 rebounds y Duncan Robinson a caba cu 15 punto y 5 steals.

Roma a gana y ta sigui cu bon chens pa clasifica pa Champions League



ITALIA: Den Serie A di Italia e prome 4 ekiponan ta clasifica pa Champions League proximo temporada y AS Roma tin un bon chens pa haci esaki. Logrando un triunfo Diadomingo di 3-2 riba Parma, e Romanonan ta na di 5 lugar di e campeonato Italiano cu 67 punto den 36 wega.

Faltando dos wega pa e campeonato yega su final AC Milan ta na di 4 lugar cu mes cantidad di punto, despues di perde contra Atalanta.

Juventus ta na di 3 lugar cu 68 punto y Napoli ta na di 2 lugar cu 70 punto. Como 1907 tambe tin chens ainda pa pasa directamente pa Champions League, cu 65 punto.

Esaki ta nifica

cu tin 5 ekipo bringando pa 3 ticket di Champions League.

E prome gol di Roma a wordo anota pa Donyell Malen den di 22 minuut y den di 47 minuut Gabriel Strefezza a empata e wega pa Parma.

Den di 87 minuut Mandela Keita a anota e 2-1 pa Parma, pero den di 94 minuut Devyne Rensch a anota e 2-2 pa Roma y den di 101 minuut Malen a anota un penalty pa duna Roma e triunfo.

Noticianan for di Hulanda

Pasaheronan Hulandes baha for di barco crusero Hondius pa nan bula bay Eindhoven



EINDHOVEN: E prome Hulandesnan a wordo baha for di barco crusero Hondius. Prome cu esaki tur e pasaheronan Spaño a wordo hiba canto y transporta cu bus pa aeropuerto di Tenerife Zuid, ministerio di Salubridad di Spaña a duna di conoce. Banda di e Hulandesnan, ta bay tin tambe pasaheronan di otro nacionalidad riba e buelo di repatria-

cion. Riba e avion Hulandes cu a bula pa Eindhoven tabata tin entre otro personanan di Alemania, Belgica y Grecia. Parti di e tripulacion di e crusero tambe ta bay ta riba e buelo cu a sali for di Tenerife. Tur esaki ta relaciona cu e hantavirus.

Teenager di Apeldoorn cu tabata perdi a wordo haya danki na cooperacion internacional di polis



APELDOORN: Cuerponan policial di Hulanda, Alemania y Polonia den e ultimo simannan a traha cu otro na un manera intensivo pa haya e mucha homber di Apeldoorn di 15 aña.

E teenager afortunadamente a wordo haya.

Tur caminda rond Polonia agentenan tabata hopi ocupa ta busca.

Ora cu el a bandona Apeldoorn mitad den luna di April, ainda e tabata tin 14 aña.

Diabierna net prome cu mey anochi e hoben Hulandes a wordo encontra na un bus halte.

Na e ciudad Bialystok den e parti oost di Polonia agentenan a topa cu e hoben drumi bao di un clechi di tapa.

E mucha di scol riba Diasabra 18 di April a bandona e bario Zuidbroek unda e ta biba, riba bicicleta.

Diasabra minister Polaco di Asuntunan Externo a duna di conoce cu e teenager perdi a wordo haya.

Segun polis e mucha homber lo tabata tin e intencion di sigui pa e parti mas oost di Polonia, pa despues bay Rusia.

Mayornan di e mucha homber mesora a dicidi di bay Bialystok

Polis a haya 340.000 euro cash, baranan di plata y armanan di candela den cas di habitante di Zutphen



ZUTPHEN: Polis na Zutphen a descubri 340.000 euro cash den camber di un cas, hunto cu dos bara di plata y algun arma.

E placa tabata completamente na biyetenan di 50 euro, den un caha. Tur cos a cuminsa ora cu agentenan policial bisti na civil Diamars dia 5 di Mei tabata cana den un parke y a wak movecion sospechoso.

Nan a wak con un persona a sinta riba un banki y na dado momento a entrega algo na otro persona.

E agentenan policial a drenta den

accion y a detene e dos personanan.

Ora a listra e sospechoso di 19 aña a resulta cu e tabata tin un pistol di alarma riba dje, un cuchio, un arma electrico y droga.

E sospechoso di 23 aña tabata tin 3000 euro cune y dos celular.

Den cas di e homber di 23 aña unda cu polis a encontra e suma grandi di placa, e baranan di plata y diferente arma.

Tambe nan a topa cu material cu ta wordo uza pa empaketa droga.

ME a actua durante protesta contra opvang di emergencia y a detene tres persona



APELDOORN: Durante un accion nobo di manifestacion contra yegada di un opvang di emergencia pa buscadornan di asilo na Apeldoorn, Diadomingo anochi por lo menos tres persona a wordo deteni.

E accion di protesta lo mester a termina 8'or di a nochi, pero despues di esey un grupo di alrededor di 100 manifestante no a tene nan mes na peticion di polis.

Esey a pone cu agentenan policial a drenta den accion.

Na dado momento e asina yama Mobiele Eenheid (ME) di polis a detene diferente persona.

For di trempa un grupo grandi di ME tabata presente pa cualkier eventualidad y na dado momento e disturbionan tabata serio suficiente pa nan drenta den accion di detene esnan cu tabata causa problema.

Noticia Internacional

Polis a aresta grupo di traficacion di mucha na Medellín

Oficina di Fiscal General di Colombia, den un operacion conhunt cu Polis Nacional y Investigacionnan di Seguridad Nacional di Merca (HSI), a desmantela un red criminal di siete persona. E red a wordo acusa di a explota sexualmente menornan di edad na Medellín y di a produci pornografia infantil cu despues a wordo bendi na Merca y otro paisnan.

E crimennan investiga a tuma luga entre juni 2024 y augustus 2025, principalmente den e distrito di San Cristóbal, e bario di San Michel, e bario di



Santa Lucía y e area di Las Palmas. Seis di e acusadonan a tuma contacto cu e victimanan den nan mes famia of circulan di bario, gañando e victimanan pa produci e videonan cu despues a wordo manda pa exterior via aplicacionnan di mensahe.

E caso aki ta parti di un problema creciente den e ciudad. Te awor na 2025, 56 persona a wordo aresta den e Area Metropolitano di Aburra Valley pa ofensanan sexual contra mucha y adolescentenan, 39 di nan na Medellín.

Merca a amplia sancionnan contra Cuba y a dirigi esaki riba e curason financiero di e dictadura

Merca a sanciona e conglomerado militar Cubano GAESA, su director, y e compania minero Moa Nickel, un empresa conhunt cu participacion Canades, como parti di un ofensiva economico dirigi na corta entrada pa e regimen cu ta goberna e isla.

E anuncio, haci pa secretario di Estado Marco Rubio, a coincide cu e retiro di e compania Canades Sherri International for di su operacionnan conhunt na Cuba, un movimiento cu analistanan ta interpreta como un señal cu e presion di Washington riba e partnernan stranhero di Havana ta cuminsa tuma efecto.

Den un mensahe riba su medionan social, Rubio a afirma: “E sancionnan impone awe ta demostra cu e administracion di Trump lo no para keto mientras e regimen comunista Cubano ta menasa nos seguridad nacional den nos hemisferio. Nos lo sigui tuma accion te ora cu e regimen implementa tur reforma



politico y economico necesario.”

E medidanan nobo ta wordo ehecuta bao di e orden ehecutivo firma pa presidente Donald Trump dia 1 di mei ultimo, cu a extende e alcance di sancionnan di Merca pa abarca casi cualkier entidad stranhero cu ta mantene lasonan comercial cu sectornan strategico di e isla: energia, defensa, seguridad y finanzas. Rubio a compaña e anuncio cu un comunicado den cual el a indica cu e obhetivo tabata “pa priva e regimen comunista y e forsanan militar Cubano di acceso na activo-

nan illicito”. El a adverti cu “por spera designacionnan adicional den e siguiente dia y simannan.”

E ofensiva di Trump contra Cuba ta bin den un contexto di presion sosteni. Desde januari, Washington a blokea suministro di petroleo pa e isla, un medida cu a empeora e blackouts ya cronico, cu den hopi provincia a surpasa diescincin pa binti ora pa dia. E mandatario a hasta declara cu e lo tuma control di Cuba “casi inmediatamente” y a menciona e posibilidad di desplega e portaavion USS Abraham Lincoln den Caribe.

Texas ta vigilando dos persona cu a biaha riba e barco crucero cu a haya un brote di hantavirus



AUSTIN: Autoridadnan sanitario di Texas ta vigilando dos persona, residente di e estado, cu a biaha riba e barco crucero MV Hondius, e barco unda un brote di hantavirus a sosode mientras nan tabata biaha den Ocean Atlantico.

E Santonan pa Control y Prevencion di Malesa (CDC), un di e instancianan di salud di Merca, a informa autoridadnan local na Texas cu e dos pasaheronan a baha for di e barco y a bula bek pa Merca prome cu e brote a wordo identifica.

E Departamento di Servicio di Salud di Texas a tuma contacto cu e individuonan aki, kendenan a raporta di no tabatin sintoma y no tin contacto cu personanan malo durante nan biahe riba e barco, segun un comunicado.

“Ambos a bay di acuerdo pa vigila e aparicion di sintomanan, pa medio di controlnan di temperatura diario y pa tuma contacto cu autoridadnan di salud publico na e prome señal di posibel malesa”, e comunicado a detaya.

E dos individuonan aki na Texas ta uni na por lo menos tres otro bou di vigilancia di autoridadnan na Georgia, Arizona y California pa posibel infeccion di hantavirus, manera a wordo revela ayera pa The New York Times.

Director di CDC, Jay Bhattacharya, a bisa ayera cu e riesgo pa e poblacion

Mericano di e virus aki ta “hopi abao” y a sigura cu ya caba e ta coordinando accionnan cu autoridadnan nacional y internacional.

E funcionario a bisa—den un mensahe publica riba X—cu e agencia a cuminsa coordina cu partnernan nacional y internacional “asina cu” el a wordo notifica di un situacion di hantavirus riba e barco crucero M/V Hondius.

Bhattacharya a agrega cu hantavirus “no ta wordo transmiti pa hende sin sintoma” y cu cualkier infeccion ta rekeri “contacto directo”.

E brote di hantavirus a wordo detecta a bordo di e barco crucero anteriormente menciona, cu tabata haciendo un biahe den Sur Atlantico, despues di a sali for di Ushuaia, Argentina. Spaña a bay di acuerdo pa ricibi e barco na Islanan Canario, despues di un peticion di Organizacion Mundial di Salud (WHO), mientras cu autoridadnan di salud ta coordina evacuacionnan medico, isolacion di pasaheronan, y posibel plannan di repatriacion.

Hantavirus ta un malesa cu ta wordo transmiti principalmente pa raton infecta a traves di saliva, orina of af y por causa sindrome respiratorio severo. Aunke algun variante por wordo transmiti entre hende pa medio di contacto directo, autoridadnan di salud ta considera e riesgo di infeccion pa e poblacion general como abao.

Noticia Internacional

Sarampi ta reaparece na New York cu casonan nobo na Manhattan y Long Island

Un brote nobo di sarampi na New York a lanta alertanan di autoridadnan di salud despues cu a confirma casonan na Manhattan y Long Island. Un mucha di cinco aña no vacuna den e Condado di Nassau y un adulto na Manhattan, tur dos sin inmunizacion como cu un historia reciente di biahe internacional, a lanta preocupacion bao di specialistanan y funcionarionan di salud.

E Departamento di Salud di Ciudad di New York a confirma e di cinco caso di sarampi den e ciudad te awa na 2026. Segun CDC, mayoria di e casonan aki ta vincula na individuonan no

vacuna y biahe pa exterior. Autoridadnan a informa cu e riesgo di un brote masal ta abao debi na e cobertura halto di vacunacion bao di e residentenan.

Sinembargo, nan ta urgi e publico pa controla nan historia di inmunizacion pa evita infeccion. CBS News y Telemundo 47 ta di acuerdo riba e punto clave: casonan confirma no a genera brote nobo ainda.

Funcionarionan di salud di Nassau County a identifica e prome caso di sarampi na Long Island den dos aña. E pashent ta un mucha homber di cinco aña cu no ta vacuna y no ta bay scol

of crèche, loke, segun e departamento di salud local, ta reduci e posibilidad di transmision pa otro nan. Na Manhattan, un adulto no vacuna a bira e di cinco caso di sarampi den e ciudad durante 2026. E Departamento di Salud di New York City a informa cu e persona a bishita e restaurant Norma den Hell's Kitchen dia 25 di april entre 5 y 8 p.m.

Tanto e mucha di Nassau como e adulto di Manhattan tin en comun e falta di vacuna y un historia di biahe internacional reciente. CDC a destaca cu 93% di e casonan reporta e aña aki na Merca ta mara na brote-



nan cu a cuminsa na 2015 of durante e aña actual, y e gran mayoria ta encera personanan cu no ta inmuniza of tin eskema di vacunacion incompleto.

Sarampi ta wordo transmiti via aire via gotanan respiratorio. Dr. Andrew Handel, di Stony Brook Children's Hospital, a splica Telemundo 47 cu e virus por keda den medio ambiente te hasta dos ora despues cu un persona in-

fecta bandona un espacio cera.

E sintomanan ta aparece 10 pa 12 dia despues di exposicion y ta inclui keintura, tosamento, nanishi ta core, wowonan cu awa, y un rash cu ta cuminsa riba cara y despues ta plama. “E rash ta yuda nos haci e diagnostico, pero muchanan ta contagioso pa cuater dia prome cu e aparece,” Dr. Handel a splica.

Meloni y Magyar a afirma nan compromiso pa atende cu inmigracion ilegal na Europa durante nan prome encuentro

Prome Minister Italiano, Giorgia Meloni a tene su prome reunion cu su futuro colega Hungaro, Peter Magyar, na Roma diahuebs, caminda tur dos a reafirma nan compromiso pa atende inmigracion irregular y a papia tocante varios asunto bilateral y europeo.

E hefe di gobierno Italiano a describi e reunion como “fructifero” y a señala cu nan a papia tocante “e asuntonan bilateral principal y e retonan cu Europa ta wordo yama pa enfrente: for di e maneho di fluhonan di migracion te na e escenarionan principal di crisis na nivel internacional.”

Meloni, un aliado anterior di Viktor Orban —kende a ser reemplaza pa Magyar despues di dieseis aña na poder—, a enfatisa cu e relacionnan entre Roma y Budapest ta “fuerte” y a expresa e intension pa “fortalece nan mas ainda.”

Di su banda, Magyar, cu ainda ta wardando pa asumi su cargo despues di su victoria electoral, a



considera e reunion cu su contraparte Italiano “constructivo y prospectivo”. E futuro prome minister a enfatisa e posicionnan comparti entre e dos paisnan riba temanan manera “accion decisivo contra migracion ilegal, e adhesion di e Balkannan Occidental na Union Europeo y e fortificacion di e competitividad di e estadonan miembro.”

E prome minister nobo di Hungría a encurasha e prome minister italiano pa impulsa inversionnan bilateral y pa financia e creacion di un centro logistico hungaro den e waf di Trieste “mas pronto posible.” Tambe el a invita



Meloni pa haci un bishita oficial na Hungría.

Dia 12 di april Meloni a felicita e lider conservador cu su victoria electoral “claro” na Hungría. “Pabien cu e victoria electoral cla na Peter Magyar, na ken e gobierno italiano ta desea suerte den su trabao,” el a declara.

Tambe el a elogia e relacionnan diplomatico entre e dos paisnan: “Italia y Hungría ta nacionnan uni pa un laso profundo di amistad, y mi ta sigur cu nos lo sigui colabora constructivamente na interes di nos pueblonan y den atende retonan comun na nivel Europeo y internacional.”

Spaña ta confirma e confiscacion di cocaina mas grandi den historia di Europa



Autoridadnan Spaño a confirma un confiscacion record di 30 ton di cocaina den un operacion cu a inclui e aresto di tur 23 miembro di tripulacion di e barco riba cua a haya e stash.

E Arconian, hibando e bandera di Islanan Comoro, a wordo intercepta pa Guardia Civil dia 1 di mei cu un carga cu Corte Nacional a balora na mas di 812 milyon euro (956 milyon dollar).

Ademas di e casi 1.300 bala di droga, Guardia Civil tambe a confisca “armanan di guerra” abordo di e barco, e agencia a declara den un comunicado di prensa.

Record Europeo
Entre esnan aresta, 17 ta

Filipino, cinco ta Hulandes, y uno ta di Surinam, e comunicado a detaya. E operacion, realisa den colaboracion cu autoridadnan na Merca y Hulanda, lo wordo detaya mas pa polis diabierna.

E confiscacion aki ta eclipsa e 25 ton recupera pa polis Aleman den e waf di Hamburg, Alemania, na juni 2024, cu tabata e confiscacion mas grandi na Europa, y ta mas cu redobla e record di Spaña propio, estableci na 13 ton haya aña pasa.

Investigadornan ta kere cu e cocaina tabata bay wordo transferi pa boto di velocidad halto riba lama grandi pa wordo contrabanda pa Spaña continental.

Pa chica Pos - Habri tubería y wc. Servicio lihe y confiabel.

Experiencia ta manda

CICLONE
Septic Tank Service

Tel: 564-0607 / 734-0607

TA FURA
ELMA UPHOLSTERY

Matras, box busca mainta y haye atardi! Set di sala, tv chair, sienta auto.

Tel: 565-5577

Macapruimstraat # 1L

CONSTRUCCION REMODELACION

Nos ta traha y drecha tur sorto di dak: shingle, eterniet, panchi, zink. Pega bloki, tegels, plafond, pleister, pone porta, lanta cura, basha vloer, construcccion di cas y apto bon prijs. Free quotation.
Tel: 561-2137

PROMASTER

Pa laba tapijt, sofa, tur matras.

99% desinfecta.

Tel: 582-0383 / 593-3538

Leslie Maduro

JR PLOMERIA Y CONSTRUCCION VBA

Nos ta haci tur trabao di plomeria grandi y chikito. Lavamanos, wc, lavaplatu y ducha.

Tel: 580-3259 • 563-4154 • 563-9130

TA CUMpra

* Holoshi antigua y moderno.

* Articulanon antigua.
Tel: 744-9995

DIRECTV

Futbol mundial na caminda, yama awo pa bo DIRECTV. Bon servicio & bon prijs. Movies, Sports, News...
Cel: 733-5762.

SUSHI

Nos ta piki sushi tur caminda, lage limpi limpi mane un soño. Pa solamente 50,- pa buelta y Ecotech apart. Yama nos na 592-5766 of 561-5179. Arubiano trahado.

Chapi, verf, tira sushi Ecotech, plumbing, construcccion, jardineria, mantencion, handyman.

WHATSAPP: 561-1397

OPORTUNIDAD

Bo mester di **PLACA?**

Ta tempo pa vende bo cas of tereno. Consejo **GRATIS** cu JZ Realty. Bini serca nos pa un coffee of thee na O'stad. Yama pa un cita: **297-730-0077**

DIARIO

Pa noticia, cumpleaños, comentario, redaccion: **noticia@diario.aw**

Tel: 582-6747

Gobierno di Merca ta considera suspende impuesto riba gasolin pa duna consumidornan un alivio

WASHINGTON: Merca ta prepara pa suspende temporalmente e impuesto federal riba gasolin meymey di aumento di prijs di combustibel debi na e guera comercial cu Iran.

Secretario di Energia, Chris Wright a bisa NBC News cu Cas Blanco lo ta habri pa vr-ies e impuesto pa reduci gastonan pa consumidornan.



“Tur medida cu por wordo tuma pa baha prijs na e pomp y reduci gastonan pa e Mericanonan tin e apoyo di e administracion aki,” Wright a bisa.

Impuestonan federal ta inclui impuestonan di 18.3 cen pa galon pa gasolin y 24.3 cen pa galon pa diesel, mas un tarifa di 0.1 cen pa galon pa tur dos combustibel. Prijs di gasolin na Merca a subi drasticamente, alcanzando un promedio nacional di \$4.52 pa galon riba dia-domingo, segun datonan di e asociacion di auto AAA, representando un aumento di mas cu 50% for di inicio di conflicto cu Iran.

E aumento di prijs di gasolin ta asotando Mericanonan, ya afecta pa inflacion, y a obliga nan pa ahusta nan costumbernan di consumo. Segun un encuesta publica na fin di april pa The Washington Post, 44% di adultonan na Merca a reduci con frecuente nan ta core auto, 34% a cambia nan plannan di biahe of vakantie, y 42% a corta otro gastonan di cas pa cubri e gasto di combustibel.

Un tema pa cada un persona reflexiona internamente:

Awe ta wordo observa e ‘Dia Internacional di Concientizacion riba EGO’

ORANJESTAD (AAN)-- Awe 11 di Mei, ta wordo observa e Dia Internacional di Concientizacion riba Ego. E meta di e dia aki ta precisamente pa reflexiona tocante con e ego ta influencia e manera con nos ta pensa, actua y con nos ta relaciona cu e demas personanan.

Leu di presenta e Ego como algo negativo so, e observacion mundial aki ta propone compronde miho y reconoce ki momento e por yuda y na ki momento e por bira un obstaculo.

Loke ta ego: Ego ta e percepcion cu un persona tin di su mes. E ta intimamente relaciona cu e identidad, self esteem, y e necesidad di reconocemento.

Nos tur tin “ego” ta un parti

normal di e personalidad. E problema ta surgi ora e necesidad aki di validacion of di control, ta domina e forma di actua y ta dificulta e convivencia cu demas persona.

Hopi discusion di dia, dia, conflictonan laboral of tension personal tin relacion cu e orguyo, e necesidad di tin semper razon, of e incapacidad di acepta critica.

P’ese, papia tocante ego tambe kiermen papia riba comunicacion, empathy y relacion humano.

Un dia dedica na ego: E fecha aki ta pretende di haci compronde con nos ta reacciona dilanti demas personanan, y con nos emocionnan ta influencia nos decisionnan.

Den e ultimo añanan, temanan manera salud mental, inteligencia emocional y crecimiento personal a gana hopi presencia den e conversacion publico. E desaroyo di e tema aki, a cuminsa haya mas visibilidad den rednan social, espacionan educativo y contencionan di divulgacion.

E fecha aki ta propone wak paden y puntra nos mes, con e ego ta influencia nos bida tur dia, pasobra compronde nos mes por yuda convivi di manera mas armonioso cu e personanan cerca y rond di nos.

Esaki ta un tema cu den diferente empresa ta wordo treci dilanti, den reunionnan di personal pa cada ken, cu forma parti di e famia laboral, haci consenshi riba su mes actitud y cada un saca e miho probecho di su ego positivo, y desecha e parti nocivo di su ego negativo, pa no comberti su mes den egoismo incontrollable. Pues, un tema di reflexion hopi interesante pa tur persona individual, den coleccion, y den comunidad.

Cu profundo tristesa Horacio Oduber Hospital a tuma nota di fayecimento di:

John Rijke

Tata di nos colega Jamelis Rijke di departamento di Revalidatie.

HOH ta desea Jamelis y demas famia hopi forza den e momentonan dificil aki.

Cu Dios duna e defunto sosiego eterno.

Horacio Oduber HOSPITAL

Gradicimento/Invitashon

Pa medio di esaki nos kier a gradici tur esnan cu di un manera of otro a duna nan sosten, a haci jamadan telefonico y a manda mensaje pa nos durante fayecimento y entiero di:

Sra. Marianita Frank-Maduro
“Mama Nita”



Nos kier yama danki na famia, amigo/a, bisiña y conocirnan cu tabata presente dia di Condolencia y dia di Entiero.

Pastor Raffi di Parokia Santa Theresita San Nicolaas.

Ad Patres pa bon servicio.

Dr. M. Wever cu a atende nos Mama cu hopi cariño y dedicacion.

Eileen, Eliza, Diana, Vicky y Maria danki pa percura pa nos Mama cu hopi amor.

Tambe un brasa grandi di nos tur, na Brenda cu a percura pa Mama Nita te na ultimo ora di bida.

Alabes nos ta invita tur famia, amigo/a, bisiña y conocirnan na 3 Santo Sacrificio di misa na Misa Cristo Rey, Brasil.

*Diamars 12 mei 2026, ora 6:30 p.m. Celebracion di Palabra

*Diahuebs 14 mei 2026, ora 8:00 a.m. Santa Misa

*Diasabra 16 mei 2026, ora 6:00 p.m. Santa Misa

Na nomber di famia Frank-Maduro



AD PATRES
funeral home

Van Rensselaerstraat 2
584-2299 / 737-2299
adpatres@qualityservice.com
Family owned and operated

SUPER CARD SUPER DEALS



**BEST CINEMA AT
THE BEST PRICES!**

**COMFORT
CLASS**

IMAX

VIP

**Monday
Thursday**

9.00 AWG

11.00 AWG

12.00 AWG

**Friday
Sunday**

10.00 AWG

12.00 AWG

13.00 AWG

Sign up **online** or at any **The Movies** location and **start enjoying great benefits!**

 www.themoviesaruba.com

Camara di Comercio a organisa un 'Business Mixer' exitoso cu un concepto di "Business Speed Dating"



ORANJESTAD (AAN): Diahuebs, 7 di mei ultimo, Camara di Comercio y Industria (KvK) a organisa un Business Mixer exitoso, unda tanto empresario nobo como algun cu hopi experiencia a bin hunto pa un anochi enfoca riba networking, intercambio di conocimiento y conexionnan empresarial.

E aspecto principal di e evento tabata e introduccion di un concepto di "Business Speed Dating", un forma structura di networking crea pa stimula participantenan pa conecta cu otro empresario den un ambiente interactivo bou di guia di Sra. Charisse Hoen. Durante varios conversacionnan cor-

tico, participantenan a haya oportunidad pa presenta nan mes, intercambia ideanan, explora posibel colaboracionnan y amplia nan red profesional di un manera eficiente y accesibel.

Varios topico a bin dilanti cu ta refleha e realidad diario di empresarionan na Aruba, p.e. e retonan di logistica, e proceso pa obtene permisonan necesario, e desafionan pa adkeri y mantene personal cualifica, cumplimiento cu obligacionnan fiscal y cu regulacionnan y e relacion cu cliente. Locual cu tambe a wordo remarca ta e desafio cu tanto comerciantenan nobo como experiencia ta confronta

den nan crecimiento cual ta e habilidad y necesidad pa por delega. E Business Mixer a crea un plataforma valioso unda emprendedornan nobo por a haya insight, guia y consehonan practico di miembronan mas experiencia di comunidad empresarial, entre otro algun miembro di directiva di KvK y otro empresarionan. Na mes momento, e grupo aki a haya oportunidad pa conoce negoshinan nobo, perspectivanan fresco y posibel oportunidadnan di colaboracion den futuro.

Pa KvK mes, e evento tabata no solamente un oportunidad pa networking pero tambe un momento valioso pa scucha directamente for di e empresarionan nan necesidadnan concreto pa asina sigui ofrece training, curso y apoyo riba e temanan correspondiente. KvK ta sigui enfatisa riba e importancia di networking y colaboracion dentro di e ecosistema empresarial local.



Door di crea espacionan unda empresarionan por conecta y siña di otro, KvK ta fortalece e comunidad empresarial y contribui na crecimiento y innovacion continuo di ne-

goshinan na Aruba.

Camara di Comercio ta mira bek cu satisfaccion riba un anochi exitoso y dinamico y ta gradici tur participante pa nan presencia y entusiasmo.



**IT'S
GAME
ON**
AT AMC UNICON

SEE EVERY MATCH, IN FULL DEFINITION.

SAVE AWG 501



98" 4K
TCL GOOGLE
QLED SMART TV
FLAT 98P8K-A
NOW
AWG 2799.00
AWG.272 MTHLY
WAS AWG 3299.99

2 YEAR WARRANTY

SAVE AWG 101



**LG 2.1 CHANNEL
SOUND BAR S40TDPANLLK**
NOW AWG 449.00
AWG.45 MTHLY
WAS AWG 549.99

SAVE AWG 81



**LG
PORTABLE XBOOM SPEAKER
BOUNCE**
NOW AWG 319.00
AWG.32 MTHLY
WAS AWG 399.99

SAVE AWG 301



**JBL
PARTY BOX 520
3120FA**
NOW
AWG 1199.00
AWG.120 MTHLY
WAS AWG 1499.99


SAVE AWG 401



75" 4K
TCL GOOGLE
QLED
SMART TV FLAT
75P8KA-A
NOW
AWG 1499.00
AWG.152 MTHLY
WAS AWG.1899.99

2 YEAR WARRANTY

SAVE AWG 201



65" 4K
TCL GOOGLE QLED
SMART TV FLAT 65P8KA
NOW AWG 1099.00
AWG.107 MTHLY
WAS AWG.1299.99

2 YEAR WARRANTY


SAVE AWG 401



75" 4K
SAMSUNG
LED
SMART TV FLAT
UN75U8000FPXPA
NOW
AWG 1799.00
AWG.179 MTHLY
WAS AWG.2199.99

2 YEAR WARRANTY

SAVE AWG 351



58" 4K
SAMSUNG
UHD
SMART TV FLAT
UN58U8000FPXPA
NOW
AWG 999.00
AWG.109 MTHLY
WAS AWG.1349.99

2 YEAR WARRANTY

SAVE AWG 201



50" 4K
SAMSUNG LED SMART TV
FLAT UN50U8000FFXZA
NOW AWG 899.00
AWG.89 MTHLY
WAS AWG.1099.99

2 YEAR WARRANTY

**2 FREE INSTALLMENTS
AND FREE DELIVERY
WITH CREDIT PURCHASE**

PROMOTION VALID MAY 1ST - 31ST, 2026. CONDITIONS APPLY.

   **569-2407**
AMC EAGLE MEGASTORE
HORARIO: 9am - 6pm DIALUNA PA DIASABRA



A topa cu vice-president di Ecuador

Premier Eman papiando riba mehora connexion aereo cu Ecuador



ORANJESTAD (AAN): Durante su bishita oficial na Costa Rica pa atende inauguracion di e president nobo, Prome Minister mr. Mike Eman a probecha pa sostene un encuentro cu vice-president di Ecuador, María Jose Pinto, caminda a dialogo e oportunidadnan pa fortalece cooperacion regional.

Durante e combersacion,



e lidernan a enfatisa e importancia di traha mas estrechamente como region, specialmente riba tema social y desaroyo comun.

Segun Prome Minister Eman, Aruba y Ecuador tin varios punto en comun y potencial pa amplia colaboracion, incluyendo conectividad y intercambio.

“Nos tin hopi pa comparti como region y nos mester sigui traha hunto pa fortalece e lasonan entre nos paisnan,” segun Eman.

Un di e temanan principal tabata e posibilidad pa mehora conectividad aereo entre Ecuador y Caribe. Eman a indica cu ya a pasa e mensahe pa investiga e opcionnan pa restablece e connexionnan cu tabatin antes, incluyendo dialogo cu aerolinea manera KLM.

E encuentro, describi como positivo y productivo, reflejando interes mutuo pa impulsar cooperacion y crea varios oportunidad nobo pa region.